

四庫全書

集部

欽定四庫全書

集部

曝書亭集卷七
九

詳校官庶吉士臣汪彥博

助教臣常循覆勘

總校官降調編修臣倉聖脉

校對官檢討臣盧遂

謄錄監生臣呂永安

欽定四庫全書

曝書亭集卷七

翰林院檢討朱彝尊撰

古今詩六

強園協洽

太原途中聯句四首

涓涓難老泉分流晉祠側

曲周王顯祚湛求

中有長生

巖冬夏同一色

彝尊

三過朝陽洞一宿羽人居

彝尊

萬籟夜俱寂想見天地

初顯祚

高歡避暑宮聞在龍山下

顯祚

馬蹄不敢踏慮有香姜

瓦彝尊

一百二十六石柱刻作經

彝尊

會須挾風峪移置水邊

亭顯祚

猛虎行

斑斑南山虎黃金環兩目獐鹿非不甘妄意食人肉

一解

朝亦伏林間暮亦伏林間將軍不敢射何況惡少年

二解

東海殺黃公山岵逐馮婦牛哀導我前左飛踞我後

三解

下士捉虎尾上士持虎頭雄豪安可常寢處託王侯

四解

陳參議

上年

署中題畫五首

香醪小榼載吳船隔岸桃花湧石泉此樂江鄉常在眼
披圖那不數歸年

密樹雲根一徑開水亭風檻足淹洄最憐略約前谿好
可惜無人載酒來

岸柳山松壓翠微
籬窰轉護柴扉
主人且莫攤書坐
看美漁舟箇箇歸

招提絕頂掩松關
茅屋巖阿竹樹環
恍憶昔游長至日
滿衣風雪括蒼山

水檻風亭八九椽
叢筠秀木總堪憐
炎天引我江湖興
懊惱黃驄白玉鞭

戲效香奩體二十六韻

綠水橋橫度紅樓
壁暗整軒牕
開了烏洞壑
隱空嵌絕

世歌難得同生感至誠裁通心叩叩愛執手慘慘匊葉

垂幺鳳釵梁綴小蛾

禾中女子有以纖蛤簇蝶綴鬢花者

緗桃簪後放碧

草鬪來芟淺黑鴉頭鞞微黃杏子衫粉融研麝和香潤

避梅黻點筆能成陣聽詩便發凡聰明箋樣改放誕酒

籌監舊譜修簫史繁聲擘阮咸目因留客送語以解圍

僥捕雀容貂戲移花信鳥鷓繡闌鶯睨坐久燕話誦

鈿鏡清於水妝階白勝城住須金作屋行即錦為帆鬱

鬱亭前柳青青牖口杉回船同別鷓去馬逐驚颿角枕

千行淚蛾眉衆女讒車輪腸內轉石關口中銜積思凝
瓊樹輕郵達蒞函犀文擣寒玉兔穎齧秋窕益智忘留
贈當歸費遠緘神光渚離合夢雨峽蘄岳虎阜東西寺
烏山上下巖當年並游地悔不姓名劓

壽陳叟

繼新

城東小徑舊升堂五載京華鬢已蒼誰肯艱難全李燮
未容名姓隱韓康風帘花市春游健雲碓青精午飯香
閭史佳辰須盡醉細論烟水送歸艎

瓊華島

艮嶽移花石離宮枕玉河年年御溝葉相送麴塵波

石島

相傳金人
自汴移此

朱碧山銀槎歌孫少宰席上賦

高堂宴客客未醉主人愛客期開顏羽觴玉爵詎足算
勸我鑿落重三醵槎枒老樹幾千歲霜皮崩剝枝柯刪
陰崖自遭鬼斧劈積雨暗齧苔紋斑尋源之使出想像
高踞兩膝頂禿鬚觀其傲岸意獨得髣髴歸自明河灣

流傳河畔逢織女所恨尚少雙烟鬢劍中鄉衝入其腹
未解刀削何由彎傳之四座叫竒絕有如白鳥飛翔翔
細看款識刻至問誰為此朱碧山良工名盛心益苦願
茲母乃經營艱主人博搜金石文向我更話天歷間丹
邱先生愛竒古命製芝菌如初攀當時虞揭相獻酬酢
是物亦得流人窠自從闖賊躡燕市大掠金帛仍西還
紛紛入肆尋鍛冶否亦道半委榛菅聞之不覺三歎息
可憐雙解今成鰥吾鄉藝事多絕倫竒巧不數古輸班

張銅黃錫近乃出未若此老技最嫻殊方促坐但醕酌
莫遣酒醒懷鄉闕

食半翅二首

賦物憐窮鳥營飛日幾迴遠依黃鼠穴低搶白龍堆不
用深弓射恒愁短翼摧年年隨凍雀重馬統干來

味合添雜筍羹宜配凍醪登盤人未識入肆價須高且
緩思鴉炙全勝食雉膏莫愁嘗易盡饒鼎戒貪饕

食鐵脚二首

本與黃頭似羣傳鐵脚名網羅謀盡取膏火遽先烹凍
免厨人割貧貪市價輕物微憐最苦化蛤也為羹

捕自愁雲外來從凍雪初體輕鷓鴣並骨脆鶴鷄如羹
臠嘗兼得腩胸法未書故鄉無爾輩只膾玉鱸魚

著雍涪灘

人日同閻孝廉

爾梅

紀處士

映鍾

陸處士

嘉淑

周處士

容

集龔尚書

昂孳

齋中得人字

汾東代北三千里惆悵花前四度春江左文章公等在

燕臺風物客愁新
戲題薛訪誇車子

時命三歌
童行酒

歌詐荆

卿和酒人不是尚書期
我數天涯淒斷此佳辰

落日

落日銜西嶺
驚沙卷北風
今年春已半
猶有未歸鴻

題高六柘塘移居圓二首

伍員吹簫市韓信垂釣臺
昔賢曾混跡之子亦多才
落月搖鄉樹
清淮上酒杯
誅茅三徑在高詠
日悠哉

草綠連隋苑
花飛憶楚州
人間從散帙
客至許登樓
自

卜羅合宅頻移范蠡舟看君圖畫意轉益故鄉愁

中秋待月和劉興詩

高館清秋會愁陰悵望中當歌延夕漏卷幔颺天風玉
葉翻雲細金波落酒紅殊方寒思早甘作鹿皮翁

華不注

仙梵開初地春秋識舊名青蓮齊吐夢石筍獨抽萌泉
憶邊庭實居連許殿卿淒涼懷舊意驅馬入荒城

自沂水至大峴山作

征衣莫浣淚痕斑
五載辭家尚未還
目送燕鴻南去盡
計程翻度穆陵關

淮水弔韓淮陰

淮陰師十萬曾此擊龍且
廢壘人猶識囊沙水漸淤
生慚諸將伍史並列侯書
千載烏江廟君臣反不如

烏江項王

廟以范增龍且配食

寄錢二枋

我登魯連臺君入淮陰市
不知千黃金何人酬國士

濟南除夕

五載論除夕依然滯異鄉
逃名成白髮歸計復青陽
樞馬喧何事燈花喜太忙
故園遺弟妹相憶或停觴

屠維作噩

鄒縣謁孟子廟二首

井地連滕壤詩書近孔門
世儒多橫議夫子獨知言
楊墨歸斯受齊梁道自尊
巖巖留氣象千載肅心魂

壞道殘碑卧祠官
異代虔爵班公一位里
紀母三遷叢

木冬春冷風燈卒史懸空今布衣士瞻拜獨淒然

曲阜晚眺同劉中丞

徑轉通油幕林深護石苔夕陽新雨過春杏舊壇開
入廟車猶在看碑日幾迴東城寒食近不上鬪雞臺

和朱十韻

宛平
劉芳躅 增美

洞庭釋菜後攜客步莓苔犧象湯孫徹金絲魯殿開
牲碑工拓就著草馬馱回媿少春秋癖言旋罷講臺

地軸

地軸連年震沂州接莒州春農千里旱野哭萬家愁鴻
鴈驚難定蛟龍鬪未休更聞城郭外蜃氣接層樓

飲歷下亭泛舟蓮子湖作二首

濟水來王屋源泉處處清自從湖口入不復地中行柳
岸鳴蟬急荷風浴鳥輕江南歸思緩髻髻櫂歌聲

海右亭仍在城隅路不賒竹深池館靜山轉柁樓斜小
隊千行柳行厨五色瓜未愁霑席雨歸櫂豁晴霞

長城堡皇姑寺

皇姑正統間尼曾入
大內諫止土木之行

十室長城堡皇姑迹未湮偶然朝鳳闕不惜撼龍鱗北
伐回轅後中宮感夢頻荒祠巫覡在猶見舞文春

度駱馬湖

自從前度黃河決董口填淤駱馬過夫柳至今喧里巷
客帆終覺厭風波東南民力愁先竭西北源泉棄尚多
安得歲星長守越年年輓粟上盤渦

淮南感事

城樓高見碧湖懸淮堰將傾近百年比歲凶荒耕未得

向來修築計誰先
預愁四瀆江河合
直恐三吳財賦捐
開濟何人輸上策
升虛急誦楚宮篇

秋日登胥山

秋水日以駛

昇尊

輕船泛清澄

周質青士

流沿轉紆曲

沈傳弓武功

櫂急黏菰菱

昇尊

仄峰尚阻樹

質近寺俄

飛梭

傳弓

窅窅梵磬出

昇尊

鱗鱗波雲興

質

流目訝突

兀

傳弓

賞心闕峻嶂

昇尊

舟維卧柳渡

質

道失寒瓜膝

傳弓

誰言培嶁微

昇尊

曲磴綠百層

質

碣殘蘚欲剝

傳

弓
祠古藤交緼彝尊 緬懷大夫節質 千秋痛填膺傳弓

覆楚豈大義彝尊 忠孝不兩能質 飲泣蘆中叟傳弓 悲

悲歌河上朋彝尊 當其恥已雪質 屬鏤非所矜傳弓 慨

此空山中彝尊 遺跡猶可徵質 刃截兩白石傳弓 指點

由孤僧彝尊 其旁卧石劒質 霜色長侵陵傳弓 皜如鋪

練帶彝尊 亘若橫丹矜質 又如常山蛇傳弓 首尾相為

應彝尊 觀其氣怒激質 毋乃神式憑傳弓 尚想鞭荆尸

彝尊 壯士心摧崩質 至今祠下水傳弓 猶作胥江稱彝尊

尊
吾徒久于役賢 遠攬岱與恒傳弓 顧茲百里內彝尊

屐齒游未曾賢 故鄉洵足慕傳弓 高興偶此乘彝尊 寄

言同心客賢 暇日期重登傳弓

上韋閣茂

寄懷李因篤

鴈門北上忽西還未得相逢一解顏傳道全家依渭曲
幾時匹馬出潼關樽前舊事憑誰說篋裏新詩待爾刪
三載齊東留滯日愁看李白讀書山

送謝

燥

入燕

記昔別君時太原風雨梁公祠五年不一見顏色竭來
濟上樽重持勞人相顧徒草草白髮青燈且傾倒歷下
亭前柳滿汀塵沙又走長安道人生聚散絕可憐吾將
歸種梅溪田夏蓋山南湖水北扁舟期我知何年

同紀處士

映鍾

杜太史

鎮

譚舍人兄

吉璉

集孫

侍郎

承澤

研山齋四首

勝序愁初豁高齋近許過圖書留客少花藥閉門多興

每耽邱壑夜從挂薜蘿千秋論述作出處本同科

啓事東曹後名山歲月深論文半縫掖真樂在抽簪遽
有忘年約虛陪作者林寥寥知己語一一感人心

野趣行無次林棲坐不辭書看金薤出杯喜竹根持戶

牖分今古朋游隔歲時齊東回首望最憶虎頭癡

謂顧
子炎

武也

改席塵逾遠看花徑轉幽猶存漢金石不廢晉陽秋客
已呼沉醉誰當續後游六街分手緩歸騎夕陽流

九日集刺梅園松下送譚七舍人之官延安四

十韻

秋風薄林木

南海程可則周量

蕭條鴻鴈天他鄉仍令

節

彝尊

高會敞離筵客盡東南美

莘亭高層雲二鮑

情

因去住懸黃花分漢苑

長洲申穉菽

綠酒自吳船繫

馬斜陽裏

嘉興李良年武曹

班荆古樹前枝撐寒雪厚

山陰沈角范康臣

幹走老龍纏空翠垂垂落

江都汪懋

麟季月

層陰的的圖旅懷長戀此

嘉興譚吉璵舟石

幽

興豈徒然歲月風塵換可則川涂夢寐牽相逢曾幾日

鼻尊

回首憶當年慷慨荆軻筑層雲飛揚祖迅鞭一官

乘絕障

繼

雙闕動行旃入雜名元重良年臨闕汝最賢

蒲桃隨馬至

角范

鸚鵡得人憐地險榆為塞懋麟原荒

鹵作田由來秦上郡吉璉遠接漢居延百戰山河舊可

則單車騎吹闐自應思魏尚彞尊那復羨張騫美政知

無敵

層雲

雄文孰與傳龍山爭繾綣繼鳳閣尚留連勝

事歸圖畫

良年

長歌當管絃江淹魂已黯角范顧愷技

誰先銀燭燒林黑

懋麟

金盤滬露鮮霜螯充海族

吉璉

香橘摘江烟麪米封鱗細

可則

更房壓鬢偏幾忘身是

客

彝尊

恰笑口流涎俊味還稠疊

層雲

深杯莫棄捐

劇談逾衮衮

穉

屢舞各僊僊聚散時難定

良年

交親志

肯遷彈冠新得路

層范

簪筆舊隨肩作吏今行矣

懋麟

專城敢任焉瘡痍何術起

吉璉

井邑幾家全不問金如

粟

可則

寧論酒是泉徵書黃霸績

彝尊

擁傳馬卿旋但

遣心期在

層雲

無愁後會愆河流千尺練

穉

月挂九秋

弦坐久頻催漏

良年

衣輕更著絛祗綠詩錄別

肖范

遂

使夜忘眠長短青門柳

懋麟

崢嶸華嶽蓮來朝一揮手

吉璉

惆悵隔幽燕

可則

題譚

漢

畫山水送七舍人兄三首

舍人佐郡出京華馬後圖書載五車欲上恒山最高頂

自馴白鹿飯松花

大漠霜流磧草枯
邗筒蘆酒急須沽
雲中西去黃河曲

未必山川似畫圖

桑乾九月未成橋想像關榆葉盡凋曾向鴈門三度宿
人家歷歷在山椒

壽徐侍讀

元文

紫纈雲霄迴

彝尊

金門雨露偏羣公爭獻納

李良年之

子信才賢甲第烏衣盛

彝尊

家聲鳳沼沿堂看遺笏在

良年

經憶過庭傳儒雅矜當代

彝尊

飛騰數妙年九重

書第一

良年

三策對無前饌出仙厨美

彝尊

袍分獸錦

鮮上陽芸是閣

良年

中禁木為天苑柳晴相映

彝尊

宮

鶯歲屢遷星軺馳漢節良年驛路入秦川得士皆殊絕

彝尊

難兄

編修學乾

更接聯遙聞臚唱日

良年

正值使車旋

兩到須迴轍彝尊

雙丁足比肩把文同謝舅

良年謂顧子炎

武

染翰失張顛賓至交珠履

彝尊

朝回並玉鞭連枝真

不易良年

初度乃居先南斗神仙錄

彝尊

江干載酒船

因人慙入洛良年

結客重投燕不謂迎縫掖

彝尊

翻教

起畫眠菜萸猶結佩

良年

醺醪此開筵瓊進崑山玉花

明祕省甄

彝尊

幽歌應可續

良年

比調有新篇

彝尊

酬潘耒

燕京秋九月雨雪紛紛浩初晴出戶去延望西山崖薄
衣先苦寒炙背返荆柴晚聞僮僕語有客叩吾齋新詩
題紈扇留贈出中懷臨風百過誦音響一何佳泠泠朱
絃瑟調必宮商諧壯哉四方志獨擢浮江淮禽戢羽
翼鳴鹿求其儕河東衛先生簡討既齋埽室道南街希音辨
元始望古窮津涯同聲一相應衆說誠可排爾雅及三
倉豪髮未嘗乖伊余去鄉國萬里散青鞵媿乏洛生詠

徒觀泰山柴夏玉聞琳瑯披雲豁塵霾譬彼同岑草所
惜在根芟願貞歲寒期簷笠行相偕

贈朱十

吳江潘耒次耕

天台拔羣峰東壁輝列宿南州盛衣冠之子為領袖
傑然雲霄姿大廈資結構匏瓜悲天懸井渫惻寒覓
間為蘇門嘯善作伶倫奏大雅還初元風騷獨馳驟
峨峨春明門英賢畢來輶高齋掃晴雪玉山驚邂逅
聞遊秦岱還應宿天門岫日輪湧扶桑幾時割昏晝

僕本同岑人折麻欣有舊才非士龍奇齒是公明幼
偶然弔燕昭金臺暫停留方辨五嶽裝青精煮糧糗
何日相提攜蓮峰掇三秀

壽申檢討

涵盼

東山零雨別不見忽三年再作京華客重逢獻壽筵歲
星方朔並午夜望舒圓滿把黃花酒幽歌九月篇

慈仁寺夜歸同李十九

良年

對雪燕有結鄰之

約

暝色辭沙界蓬門更埽除數錢燈下酒入饌雪前魚遠
作比隣約相連水竹居扁舟當此夜來往意如何

孫少宰蟄室觀吳季子劔四十韻

窮冬蟄室寒重扃晝飛雪

嘉興李良年武曾

役車雖已

休客子遠相挈

彝尊

蕭然主人意示我太古鐵

吳江潘

未次耕

黯淡四座光糝糊百夫血

上海蔡湘竹濤

精氣

所結聚入手詎敢褻

良年

摩挲讀遺銘千春字不湮

彝

尊始知延陵佩曾挂徐君碣

未金碧爭毫芒雨風助鳴

咽湘歲久蠟就頽中作黍米缺良年段治難為良青白

氣先竭

彝尊

首廣信參分身重裁七錡未丸丸初莖長

衍衍漸後設

湘

制類銅虎符質並蒼水玦

良年

其文雜

蟲魚其體蔓瓜瓞

彝尊

蜿蜒蛟螭纏錯落星宿列未當

其鑄始成見者皆骨裂

湘

洪鐘無聲拂堅玉應手切良

年拭用華上良淬以江水洌

彝尊

一充君子服遂使雌

雄別

未

神靈相護持鬼物盡蹙躡

湘

試宜借諸離相必

經歐薛

良年

適楚羞湛盧制越定姑蔑

彝尊

神物不虛

歸抗首想前哲

未

紛紜春秋季推刃相篡竊

湘

何為貌

千乘脫屣意不屑

良年

遠繼讓王風近慕子臧節

彝尊

投分寄縞帶達音在樂闋

未

寸心義所要存沒傷中訣

湘留贈物則微高誼泉壤徹

良年

古樹風蕭蕭下為孤

兔穴

彝尊

何期陵谷變土花未云齧

未

依然出人間百

代共傳閱

湘

題字勛孔碑裝炭談越絕

良年

接末驚窮援

千霄飲雌蜺

彝尊

雄思崆峒倚利想犀兕截

未

是物洵

希有寧許膜眼別

湘

博物賴張華造書辨臣頡

良年

豈

為馮生彈聊效莊叟吹舜尊感我壯士懷慷慨中腸熱

未持之被不祥可以當桃列湘

雪牕

寒威凌夾牕夜色不可拚舜尊初疑弦月駐載驚鄰燭

燄蔡湘漏鼓凍欲沉荒雞號已漸舜尊攬衣訝手皸出

戶怯風颭湘朔氣何稜稜同雲猶澹澹舜尊饑鷹距未

擊啅雀羽齊斂湘老樹壓更高遙岑明復暎舜尊灑壑

過冰泉浮空露仄仄湘僧閒梵未放磴滑樵愈險舜尊

恍若玉井峰蓮花冠郊陝湘中田從射兔北園宜載獫

彝尊

挂冷生濕烟草枯覆叢蘄湘近須爐火圍遠愛酒

旗閃

彝尊

就市沽芳馨傳杯馮激灑

湘

元叔囊垂空平

仲豆猶掩

彝尊

旅思話歸吳扁舟懷入剡

湘

東新硯初

炙斐几翰斯染

彝尊

形兼洛陽卧跡異昌黎貶

湘

撒鹽

擬詎工授簡賦何諂

彝尊

郢曲有和歌殊鄉聊自憚

湘

雪中過程五倉部同李十九蔡大賦二首

長安風雪後歌舞閉門重客子誰能記倉曹獨許逢牕

寒留炙硯日暝坐聞鐘更約尋香閣西山對曉峰
今子趨庭早深杯勸客揮愛者如意舞判倒接羅歸易
酒行無算吳鹽撒漸稀憑將紅燭淚試作鳳凰飛

壽何侍御

元英

東閣寒梅放西山霽色澄騷人日初度朋酒歲相仍頌
魯期難老歌幽信有徵名先柱下史官亞殿中丞禮自
猶龍擅謠聽避馬曾城南瞻斗極薊北凜霜稜敢諫虞
箴在籌時國寶增文宜蠲瑣細獎力埽榛芳水旱謀誠

切徵輸法可承廟廊需至理駟驗必深懲疇昔雙龍闕
逶迤四牡乘桂林銜羽節勾漏問丹稗嶺外收區冊舟
中慕李膺含香持國計聚米佐軍興允矣資喉舌良哉
寄股肱人倫誰比似意氣益飛騰八顧三君並千金一
諾憑聯詩過沈范愛客邁春陵勝日交珠履高齋冒紫
藤對門深徑轉開閣小山層畫得滄洲趣書傳草聖能
連蜷師衛藹妙麗奪曹蠅籤帙縱橫列爐煙遠近蒸庭
間看玉樹道重比朱繩謬喜粉榆託相親色笑恒一行

來獻兕萬里此羸滕月尚今年滿觴同舊里稱頌椒春
序近懷核舞筵登青眼人人識朱顏歲歲凝不辭五雲
裏長對九枝燈

曝書亭集卷七

欽定四庫全書

曝書亭集卷八

翰林院檢討朱彝尊撰

古今詩

重光大淵獻

立春日同李十九飲孫少宰蟄室有懷曹侍郎
在里

七度辛盤會他鄉歲歲殊未知今夕讌得與故人俱舞

鶴喧庭榭飛花灑畫圖因懷鉏菜叟萬里隔春燕

西山書所見

斜陽猶未鎖松筠雪後風清石路塵莫笑游人今歲早
馬頭山店已燒春

同作

上海

蔡湘 竹濤

中官墳墓碧雲齊樵客東風飲恨啼故向黃茅遺爨
火亂山燒過夕陽西

卧佛寺

路入晴雲北山欹卧佛前津梁疲已甚土木意能傳夜
續林中磬春流枕外泉長安車馬客輸爾只高眠

題退谷

退翁愛退谷未老先抽簪行藥亂峰路築亭雙樹林閒
中春酒榭靜裏山泉音滿目市朝貴何人期此心

來青軒

天書稠疊此山亭往事猶傳翠輦經莫倚危欄頻北望
十三陵樹幾曾青

鮑家寺白松歌

鮑家寺中九白松扶踈宛似桂之樹密葉陰連古殿寒
霜皮畫偃盤根互我來繫馬風冷然入門四顧喜欲顛
巢鼓迴見鶴鶴坐榦老不數蛟龍纏長廊飯僧僧未至
松子松花飄滿地半嶺平銜夕照曛雙林遠勝春浮翠
其餘四株皆可娛矯矯離立空牆隅枝柯雖殊無異色
知是歲寒霜雪俱山僧怪我摩挲久茗盃簾前一招手
此樹今來二百年問余歲月能知否

同作

蔡湘

巖下石門苔蘚重早春已發
花茸茸晚風吹墮一黃
鶴棲在月明何處松

玉泉山下別瞻公

石橋風泠泠夕曛斷崖口回
指翠微深山僧此分手

贈歌者陳憐二首

樂府新傳夜度孃吳衫白紵
越羅裳愁看玉面燈前出
笑問銀鈎若箇藏

金史曰... 卷八
千鍾已分醉如泥授色留賓曲轉低想像天河猶未落
長鳴不聽汝南雞

贈冒嘉穗二首

我昔齊東住君來歷下遊客亭無奈別樽酒未言愁暑
雨城西寺高林棗外樓醉歌今始得同調日相求
盡說移居好投詩給事莊松筠深不見丘壑興何長夜
燭攤書坐春醪並馬嘗追隨吾更數知愛接輿狂

何侍御元英

招同高上舍層雲士奇

繆處士永

諫
趙舍人隨鄭舍人宣飲刺梅園松下四首

禁烟高詠遍龍潭
未得同游祇自慚
小榼春風攜最好
又騎驄馬到城南

客來隨意但圍碁
細草空園席履移
憶過松陰三度醉
未知此會恰花時

吾家池上雙槐好
此樹連蜷想像間
最喜諸公盡吳語
一時把酒話鄉關

離筵九日記曾開
送客西征上郡隈
正向樽前論往事

不知天外一書來

庚戌九日集此送譚士郡
丞兄是日適得榆林來札

周郡丞

令樹

遷太原守詩以送之兼懷傅處士

山

五馬西歸日銅符領晉陽
川臨潦涇近山轉岨岵長
童子爭驂篠邦人尚詠棠
憑君尋傅叟暇即過松莊

將出都門曹舍人

貞吉

黃舍人

仍緒

沈舍人

脩

范

喬舍人

萊

曹舍人

未

汪舍人

懋麟

招同高上

舍

層雲

李秀才

良年

賦詩贈行口占留別

鳳池才子各翩翩
攜客城南釀酒錢
滿眼鶯花無奈別
河梁愁思復今年

和程遠龍尾硯歌為方侍御序咸作即送其入

粵

硯有辛卯米芾四字
印舊藏黃公道周家

龍眠柱史饒硯癖
篋藏龍尾開深窪
雀臺古瓦詎比數
石末未許青州誇
黝如純漆久欲脫
粹若水玉堅新剗
中央私印尚可識
流傳乃自元章家
騷人生年記辛卯
初度肇錫名何嘉
十椽彙開見八八
兩已相背無狐邪

當其片石始入手重之豈易黃金車雲峰糝糊潑急雨
雪繭天矯騰修蛇東都淪後內庫發重寶散失同紛麻
赤瑚玉英半缺折物理所貴韜其華流傳迄今六百載
山骨完好無纖瑕黃公昔年在漳浦以此注易緯蒼牙
嗚呼聚散勢所必精靈呵護靡幽遐房融有硯譯梵字
遺蹟尚爾矜僧伽平公巨璞本光滑少陵野老猶咨嗟
况茲貞質世鮮兩宜為有識羣高奢前歸大滌後龐谷
顛人地下應哈呀黃海布衣嗜奇最吟成古調歐淫哇

盤空硬語難驟讀詩膽直欲凌劉又謂余吾歌子當和
峇云四座且莫譁我昔南游度大庾羚羊峽口戈船划
手披煙液入巖穴硎礧硧碗圍周遮石紋蘊秀各異狀
就中最美數青花有時精氣凝作眼碧者鸚鵡黃者鴉
火輪奔處界微白宛似蕉葉抽春芽其餘瑣細盡當辨
黃龍翠羽兼丹砂爭如此石鐵色古稜角漸去成硧礧
柱史聞之忽狂叫便欲五嶺探雲霞隋隄三月送君去
柳絲藤蔓何甦望黯然消魂萬里別長言不覺肆滂葩

賦得官柳送人自濟入燕

官路垂楊柳春風處處青
遙憐烟雨色何限短長亭
送子燕臺去還從歷下經
七橋明月夜繫纜有荷汀

紅橋

春蕪小雨滿城隈
茅屋疎籬兩岸開
行到紅橋轉深曲
綠楊如薺酒船來

題何氏書樓

屢醉齊東酒曾開薊北書
林泉尋舊好瀟灑勝吾廬
籬

額仍通燕堂坳亦有魚蘭成擅詞賦宜作小園居

早

水潦江淮久今年復旱荒翻風無石燕蔽野有飛蝗
桎梏懲屠釣槽巢迫死亡虛煩乘傳使曾發海陵倉

送越孝廉

闈

入楚蕪作廬山之游

蕪城相見惜蹉跎又送雲帆楚澤過九疊屏風何處好
三湘芳草至今多尋山應得逢匡俗作賦還看壓景瑳
準擬歸來秋月滿樽前同聽大堤歌

逢周侍郎

亮工

二首

悵別西湖曲重逢又十年艱難增旅話傾倒共詩篇春

遠仍題扇江寒未放船甘棠留召伯聽取舊歌絃

侍郎
曾觀

察揚
州

阿戎頻問訊

公子
在浚

燕晉兩鄉俱道已甘三黜家從泛五

湖登臨山屐在存沒酒人殊

感王猷定胡
介諸舊游也

白髮明燈裏

飛揚不可無

酬彭

師度

三首

燕郊春雨灑塵輕我唱驪駒子送行
回憶酒人天外隔
不知舟楫下蕪城

艾家橋北論交日回首星霜十九年
祇向天涯相送老
新詩讀罷一淒然

竹西酒市接平山燈下妖姬十八鬢
留取霜紈調錦瑟
紅橋一曲送君還

送柯大

崇樸

還里魚寄周

質

渡淮三月滯江都送爾歸尋舊酒徒
十幅蒲帆鄉樹杪

夜船聽雨到南湖

送葉上舍

舒崇

之睢陽

昔游同鼓山陰權我年方壯君尚少紅妝隔座送藏闥
君醉宵眠我狂叫江湖轉眼遽離羣東尋百越西三雲
幾回落拓來燕市秋草金臺共夕曛君今三十猶貧賤
吳楚山川遠游遍天涯聚散二十年鄉里何曾一相見
酒人燕市愛君詩置酒邀君必我期城東城西夜漏午
呼僮襍被恒相隨謂當同醉椒花酒夜雨新年剪新韭

豈意驪駒忽在門，贈行不待春楊柳。
黃塵千里盧溝橋，朔雲慘淡風蕭條。
短衣匹馬睢陽去，正值梁園雨雪飄。
平臺滿目皆狐兔，對雪相如可重賦。
若見當壚勸酒人，也應憶我長安路。

譚孝廉十一兄

璫

歸自楚粵訪予維揚喜成三

首兼懷郡丞七兄

吉璫

在榆林

鄉園十載隔相對，總殊方髮短愁先鑷。
杯深喜益狂寒，梅探庾嶺秋草下。
涔陽未暇歸三徑，明燈話射堂。

柳岸舟同汎蕪城草乍班望衡曾九面夢雨得雙鬢車
騎將休汝榆林欲度關雕蟲何足尚辛苦羨名山

十月邊城路曾傳上郡鴻弟兄三歲別夢寐幾人同望
遠平山隔懷歸舊業空回思童穉日誰料各西東

雪霽同周儀部

襄緒

對酒康山二首

一簣城隅出千家雪後勻江湖談往事絲竹老斯人

對謂

也山不厭尋幽晚惟應對酒頻寒梅意蕭瑟想見武功春

樽前橫蜀嶺寫下起吳歌繫馬從星使憑軒覽漕河雪

深花尚發風急鴈翻多有約江春到行厨次第過

玄默困敦

題竹垞壁

買斷竹垞將四載園林新筍未經嘗今來散帙時初夏
忽見抽稍喜欲狂背市有人酤濁酒南鄰許我借匡牀
江村卧穩真堪樂愁說燕雲射獵場

雨度仙霞嶺三首

縹緲江郎石朝來竟不分客愁偏暑雨祠古但寒雲小

市兵戈盡飛泉下上聞泥塗雖自苦暫喜遠人羣

岸缺人猶度橋迴徑轉偏古苔綠樹上密竹聚峰圓白
袷晴還濕青鞵暮屢穿笑看茅屋近編筏渡溪烟

仙霞高不極半嶺一雲平倚杖驚吾老攀崖羨客行經
心蒼蘚滑照眼白花明回首楓林暮先秋葉自鳴

題福州林秀才竹亭

道南移宅後蕭瑟草堂費尚有孤亭在堪歌伐木詩翠
蕪梧下竹黃坼圃中葵最愛涼風滿無煩羽扇持

泰安道中曉霧

苦霧滴成雨平林翳作峰不知巖際寺恰送馬頭鐘
汶水已爭渡泰山猶未逢忽驚初日躍遠近碧芙蓉

重陽前一日沈

晦日

鮑

夔生

載酒柯氏園亭同

諸子分賦蕪感舊游成十二韻

水竹通三徑星霜隔幾年悲歌同調續秋色異鄉先業
落交簷樹雲寒欲雨天解鞍嘶騎擁載酒麴車連席嚮
西南上杯行少長前從容寬禮數傾倒迭詩篇楚舞何

相似秦風亦有焉吟看吳會並交取性情便二子真同
好相期幸未愆臨池良不厭舍坐屢教遷破帽垂垂落
疎簾處處懸籬花平綴錦沙鴈小如拳薄暝爭投轄提
壺更數錢風燈升降影茅屋去來烟衰藉囊萸早宵因
說餅延塵埃驚老大身世益迤邐尚憶班荆地曾開送

別筵舊游惟沈

岸登

鄭培

遠夢各山川榆塞橫汾曲

七譚

郡丞兄吉
璉潘二未

蠶叢桂竹偏

高層雲
李良年

中郎遺爨笛

蔡湘

歎逝

轉悽然

柯將軍園亭即席分韻送柯三

維楨

還嘉善

匹馬高陽返曾探玉女崖征衣猶雨雪歸櫂復江淮客
有悲歌獨文傳別賦皆葛疆池上月後夜不勝懷

送計孝廉

東

還吳江

三年歸計總蹉跎日見輕舟下潞河君去登高誰對酒
空憐秋色異鄉多

送陳

欽

之青浦

憶同九日登高讌益信陳琳最善文易水自來長送客

金句已居人三言
卷八
詞人且免學從軍
帆飛薛澗連鄉樹
鶴下華亭劃海雲
吾老思歸猶未得
天涯歲月總離羣

送汪戶部琬還長洲

殊方動惜故人違
聽唱驪歌淚暗揮
白下乍傳星使返
江東忽見步兵歸
苔華徑曲藏書屋
蓮葉舟輕上釣磯
不獨文章今日少
誰能未老念荷衣

送陳叟南歸

軍都關口朔雲凝
羨爾臨行匹馬登
歸向高陽逢舊侶

銜杯試話十三陵

昭陽赤奮若

人日謁景皇陵

重湖裂帛已流澌岸柳三眠又一時尚有寢園開夕照
每逢人日撫殘碑童童獨樹栖禽少冉冉長途下馬誰
回首昌平山近遠裕陵松柏總淒其

同劉侍郎

芳躅

入大房山時劉編修

芳詰

養疴

山中八首

羣峰迴合靜飛塵野杏山桃各自春不共南陽劉子驥
花源一望已迷津

丹梯直上與天連鐵鎖垂垂百尺懸安得山中十日雨
石門一道迸飛泉

帝城回望陽峰霞蘭若松門自歲華剩有紅羅宮監在
香臺猶禮九蓮花

上方層閣少經過猶有樵人樹杪歌試乞山僧老藤杖
天風扶上摘星陀

解道劉伶善閉關
田衣竹杖此躋攀
長安車馬紛無數
誰肯高居六聘山

春風依舊野棠紅
麥飯僧厨餉客同
不用三車頻問法
白頭試話玉熙宮

定公八十猿猱捷
峻嶺何曾策杖遊
邀我遠登龍虎峪
翠巖天半結飛樓

羊何此日和歌成
夢草池塘句更清
刻取谿亭雙櫟樹
千春長識謝公名

過何侍御丹臺書屋二首

一飯長安地先生許數來
牕虛同畫舫徑盡出丹臺
風幔宜斜卷庭花獨早開
但令施枕簟日日此銜杯

宛在山茨下層陰罍小亭
花移大房茜石帖太湖青
筆斷何妨續琴歌亦可聽
閒來須賭墅一為寫黃庭

送喬舍人萊還寶應

今秋甲子雨不絕小池殘
暑風淒淒棧車難行瘦馬滑
終朝兀坐愁雲低有客上書
臨欲去折簡招我斜街西

房山香醪貯一石浮以斛角暹羅犀定州瓷盃白如雪

津門紫蠟團霜臍坐中曹

舍人

汪

舍人

懋麟意氣古杜詩韓

筆名相躋草堂圖畫凡幾幅酒酣並起爭留題龍竿寺

旁射陂曲中分一水名柘溪君家嚴君

侍御可聘

此游息翠

烟繚繞含晴霓王官谷深城府隔武陵花發時人迷只

今八十尚健飯過橋不用扶青藜郵籤此去秋未晚籬

邊圓菊黃花齊連江峭帆檻外落一雙老鶴階前栖衡

門啓後綵衣入定使眼膜開金篋桓山四鳥雖折翼

時舍

人有
兄弟

循陔庶免心酸
兼珍之膳娛永日
靜觀節物移

暄萋嗟余旅食尚淹滯
懷鄉未得瞻秦稽
送君沉吟數
長路寸心千里隨輪蹄
維揚稷稻美自昔
邇來厥土仍
塗泥灣頭清水聞更決
上流未築歸仁隄
千村廬舍總
昏墊可知鴈戶猶悲啼
漕船萬斛輓不上
荒岡斷岸何
繇梯大倉紅粟漸已貴
曷歸長水親鉏犁
期君歲暮白
田上
班草城南手重攜

和韻送徐編修

乾學

還崑山

潞河臨發動晨颺惜別重歌折柳辭前席定來宣室召
蹇驢仍借杜陵騎秋深準續登高約月出應懷對酒時
賓從玉山知不少相思定寄草堂詩

藍秀才見示劉松年風雪運糧圖

潞河十月櫓聲絕連檣如薺啼飢烏層簷炙背苦岑寂
有客示我運糧圖遙峰隱隱露積雪村原高下紛盤紆
千年老樹風怒黑寒葉盡脫無纖枯人家左右僅茅屋
傍有水碓臨山厨秕糠既傷力輸稅安有甌石存桑樞

大車檻檻四黃犢疾馳下坂尋修塗嗟爾農人歲已暮
婦子不得相歡愉披圖恍見南渡日北征甲士連戈艾
當年諸將猶四出轉粟未乏軍中需同仇大義動畎畝
輸將豈畏胥吏呼始知繪事非漫與堪與無逸幽風俱
古來工執藝事諫斯人畫院良所無嗚呼斯人畫院良
所無不見宋之君臣定和議笙歌晨夕游西湖

席上贈陸生三首

江東陸弟擅風流負笈今為萬里游畫取燕臺山近遠

黃雲白雪一時愁

芳筵鮭菜故鄉同
刻燭藏鈎漏未終
閉戶須為十日飲
銜杯最愛百分空

風雪寒凝老樹枝
蟹螯深夜且同持
前身定是周邦彥
醉裏能歌片玉詞

夢硯歌為汪舍人

懋麟

作

我怪汪舍人
卧疴嬾朝參
眼前富貴非所好
惟於載籍
偏沉酣
無錢可糴
太倉米
僮僕入市心
懷慚舍人舒膝

方晝寢如蟲食蓼翻知甘忽然夢入無人區廣庭巨室
何歎歎中羅石硯十有二一一就視烟雲含鼉磯苦堅
龍尾滑洮河水玉徒窺窳詎若羚羊峽中質青花白葉
波亭涵良璞得一亦已足十二盡取母乃貪覺來伏枕
賦長句中心惆悵真難堪為語舍人且莫貪高峽路吾
能諳昔年著屐入巖穴親斲山骨施斧鑿黃金盡散要
不惜一百八石巖前擔自從輕舟發大庾篷牕一日摩
抄三榜人潛窺竊其九餘歸見者爭來擗眼看美好盡

已去何況夢寐侈空譚舍人翻然釋惆悵留余濁酒開
新壘紈如漏鼓猶未起起時月落天西南

王尚書輓詩八首

坤維初震後元老忽淪亡

九日地震越三日公沒

已定春帆計翻

教夜壑藏把杯人未散戀闕意堪傷盛德今徂謝悲看

大鳥翔

西掖存封事南天返使車位仍三獨坐職半六尚書典
禮真無忝論文盡不如最憐羣弟子入揖共欵戲

九日龍潭燕招尋自此休

公每歲九日燕客賦詩於黑龍潭

遲歸因酒

債垂死及山游

九月七日公扶病遊萬壽寺

別袂何曾把

時余赴通州

詩

篇總未酬重來清淚迸風急總惟秋

京華留滯久恒苦出無車記憶惟公切過從聽我疎頓

忘何日別急簡舊時書剩有雷塘句臨歧襍飲初

辛亥上巳

余從京師至揚州公以詩贈行

墨自臨池妙詩先過嶺工換鷺何太苦刻燭未教終匹
練題長遍聯篇思轉雄要知作者意肯與古人同

別有新詞麗樽前賦物華歌翻舊桃葉笛按小梅花檀
板柳三變金荃溫八又江南腸斷句回首向誰誇

公最賞余

阻風湖
口詞

含玉遺孤在招魂上客存天邊丁令鶴夢裏謝公墩笳
吹將歸路田廬何處村應同鍾太傅丙舍寄諸孫
已輟青門餞空憐白馬留九京應萬里百口但孤舟逝
矣名須易傷哉涕莫收寄聲縫掖賤休作帝京游

送龔孝廉

宜生

掌教涿州

圖經雄涿鹿壁沼亞橋門錦里仙人水樓桑帝子村詩
傳頤盡解官冷道彌尊不遠房山麓相期泛竹根

九言題田員外雯秋汎圖

田郎與我相識今十年新詩日下萬舌爭流傳黃塵撲
面三伏火雲熱每誦子作今我心爽然開軒示我秋汎
圖五丈鴨頭畫出宛似吳中船大通橋北官舍最湫隘
箕筥斗斛囊橐羣喧闐他人對此束縛不得去田郎掉
頭一笑浮輕漣疎花蒙籠兩岸渡頭發蹇驢蹶躡百丈

風中牽五里十里長亭短亭出千絲萬絲楊枝柳枝眠
當其快意何啻天上坐酒杯入手興至吟尤顛慶豐牖
口自有此渠水未知經過誰子曾洄沿倉曹題柱名姓
不可數似子飛揚跌宕真無前長安酒人一時賦長句
我亦對客點筆銀光戩蓬牕寂寞不妨添畫我從子日
日高詠秋水篇

寄懸公

竹外繩橋渡口鐘別來消息五春冬南湖虛有煮茶約

下若幾曾歸擢逢去鴈書成難問訊愁猿路險怯過從
衰年願得精廬近須卜橫山第一峰

曝書亭集卷八

欽定四庫全書

曝書亭集卷九

翰林院檢討朱彝尊撰

古今詩八

闕逢攝提格

春雪二首

臘去初無雪春來盡日飄披離侵柳陌取次及花朝入
夜飛何急因風卷未消攜錢思縱飲不用酒旗招

客久催蒼鬢師行冷鐵衣漸看迴鴈近只共早梅飛闕
塞愁無極鄉園信轉稀空憐兒女在遙計放船歸

送龔大之淮陽

潞河遲日送征驂禁雪初晴柳尚含一路青山到淮浦
照人明月已江南

汪舍人

懋麟

以丁娘子布見贈賦寄

丁娘子爾何人織成細布光如銀舍人笥中剛一疋贈
我為衣禦冬日感君戀戀情莫踰重之不異貂襜褕攜

歸量幅二尺闊未數星紈與荃葛曬却渾如飛瀑懸看
來只訝神雲活為想鳴梭傍碧牕摻女手定無雙浣
時應值濺裙水漂處除非濯錦江長安城中盛衣馬此物
沈思六街寡剪作輕衫春更宜期君再醉天壇下天壇
三月踏青時領邊短鬢風吹絲試尋油壁香車路追逐
紅禪錦髻兒

寄高

層雲

萬里歸舟興有餘蜀薑召客鱸鱸魚酒邊可憶朱齡石

深夜明燈勘羽書

王尚書

崇簡

招同錢

澄之

毛

會建

陸

元輔

陳

祚

明嚴

繩孫

計

東

讌集豐臺藥圃四首

上苑尋幽少東山載酒行
發函初病起出郭始心清
一老風流獨羣賢少長并
甘從布衣飲真得古人情

水淺孤村外亭開萬柳中
流觴過上已卷幔已南風
旅話江湖別幽期出處同
接羅拚共倒舉手對山公

山田圍輞水左右出豐臺
是日孤亭坐繁花四面開
蟻

浮傾更滿蝶舞去翻來即事多高詠天涯不易哉
麗草攢細蕊晴風捲絳雲井華宜近汲衣桁忽斜曛興
自抽簪發人因賭墅分重過知不厭歸騎且紛紛

送鄭培南還

長安似爾客最久自別舊鄉今八年五里亭邊傾薊酒
一帆風末挂吳船承顏正好趨庭日生計須謀負郭田
莫以故人歸未遂卜居不與竹垞連

鴛鴦湖權歌一百首

有序

甲寅歲暮旅食潞河言歸未遂爰憶土風成絕句百首
語無詮次以其多言舟楫之事題曰鴛鴦湖櫂歌聊比
竹枝浪陶沙之調冀同里諸君子見而和之云爾

蟹舍漁村兩岸平
菱花十里櫂歌聲
儂家放鶴洲前水

夜半真如塔火明

宋朱希真避地嘉禾放鶴洲其園亭
遺址也余伯賁陽守治別業於上真

如塔峙
其西

沙頭宿鷺傍船棲
柳外鷺鳥隔岸啼
為愛秋來好明月
湖東不住住湖西

春城處處起吳歌，夾岸疎簾影翠蛾。
一葉舟穿妝閣底，

傾脂河畔落花多。

傾脂河在楞嚴寺東，人家多跨水為閣。

寶帶河連錦帶斜，精嚴寺古黯金沙。
牆陰一逕遊人少，

開遍年年梓樹花。

寶帶錦帶俱水名，精嚴寺多梓樹。

西埏里接韭谿流，一簣鉞山古木秋。
慣是爭枝烏未宿，

夜深啼破月波樓。

西埏里戴干寶搜神在嘉興縣治西，韭谿之水經其下，鉞山宋時酒務月

波秀州酒名，載張能臣天下名酒記。樓係令狐挺所建，宋人集題詠詩詞甚多。

和韻

嘉興

譚吉璉

舟石

蘇小墳前水北流
茗花梧葉滿園秋
月華不與高城隔
飛上星湖第一樓

檇李亭荒蔓草存
金陀坊冷寺鐘昏
湖天夜上高樓望

月出東南白苧村

檇李亭址在金銘寺北宋岳珂為勸農使居金陀坊著金陀粹編寺南有

樓名湖
天海月

和韻

譚吉璉

胥江不遠小山存
猶有遺祠翠木昏
挂席西風乘興去
白蓮秋水夕陽村

百尺紅樓四面牕石梁一道鎖晴江自從湖有鴛鴦目
水鳥飛來定自雙

和韻

譚吉璉

水市花船一樣牕龍淵學繡一條江憑誰移箇龍淵
塔學繡村邊也作雙

倅解偏宜置酒過亭前花月至今多不知三影吟成後

可載兜娘此地歌

陸游入蜀日記倅解花月亭有小碑
乃張先雲破月來花弄影樂章云得

句於此亭也張子野云往歲吳興守滕子
京席上見小伎兜娘後十年再見於京口

女牆官柳遍啼鴉小閣臨風卷幔斜笑指孩兒橋下水

雨晴漂出滿城花

孩兒橋在天寧寺東石闌盡刻作孩兒戴魯應龍括異志

檣燕檣烏繞楫師樹頭樹底挽船絲村邊處處圍桑葉

水上家家養鴨兒

樂府阿子歌注嘉興人養鴨兒作此歌

桃花新水湧吳艚十五漁娃櫓自操網得錢塘一雙鯉

不知魚腹有瓜刀

錢塘杜子恭就人借瓜刀其主求之曰當即相還耳既而刀主銜至嘉興

有魚躍入船中破魚腹得瓜刀見搜神後記

穆湖蓮葉小於錢卧柳雖多不礙船兩岸新苗纔過雨

夕陽溝水響谿田

和韻

譚吉璉

春來河蜺不論錢竹扇茶爐載滿船
沾得梅花三白酒輕衫醉卧紫荷田

金衣楚雀白鷄雞不住裴公島上啼
白馬未嘶雲屋外

紅船先度板橋西

裴島即放鶴洲
相傳裴休別業

隄外湖光隄內池露荷珠綴夜涼時
阿誰月底修簫譜

更按東堂舊日詞

毛滂在秀州賦月波樓中秋詞云露
荷珠綴照見鴛鴦睡月底修簫譜樂

府調名東堂

滂集名也

鴨餛飩小漉微鹽雪後壚頭酒價廉聽說河魼新入市

萋蒿荻筍急須拈

方回題竹杖詩跳上岸頭
須記取秀州門外鴨餛飩

城北城南盡水鄉紅薇徑外是回塘千家曉閣紗牕拓
二月東風蕙草香

和韻

譚吉璉

江村復禮舊名鄉竹作笆籬石作塘到處十家三酒
店春波繫纜岸花香

西水驛前津鼓聲原田角角野雞鳴
臺心菜甲桃花里

未到天明權入城

西水驛在城西桃花里人多種菜為業

和韻

譚吉璉

棟子花踈過雨聲
禁山看火樹頭鳴
鄰船兩槳買桑

葉南抵餘城北渚城

姑惡飛鳴觸曉煙
紅蠶四月已三眠
白花滿把蒸成露

紫萼盈筐不取錢

姑惡鳥名蠶月最多野蒿蔽開白花田家籬落間處處有之蒸成香露可

以澤
髮

村中桑斧響初停溪上叢麻色漸青郡閣南風纔幾日

荷花開滿鏡香亭

府城西北有麻溪鏡香亭在慈恩寺南今廢

徐園青李核何纖未比僧廬味更甜聽說西施曾一搯

至今顆顆爪痕添

徐園李核小如豆絲懸其中僧廬謂淨相寺產攜李每顆有西施爪痕

藉架橋上水松牌白石登登鴈齒階曾記小時明月夜

踏歌連臂竹鄰街

竹鄰里元陳秀民所居藉架橋在其東北

谷水由來出水湖渚城壁塞總春蕪戰場吳楚看猶在

折戟沙中定有無

水經注引吳記谷水出吳小湖逕由拳縣渚城在今城北十五里水經注

又云浙江又東逕柴辟南舊吳楚戰地脩侯於此故謂之辟塞

金魚院外即通津轉粟千艘壓水濱年少女牆隨意望

縫衣恰對柁樓人

輿地紀勝金魚院在嘉興縣西北

懷家亭館相家湖雪艇風闌近已蕪猶有白蘋香十里

生來黃蜺蛤蜊麴

懷悅居相湖南闕柳莊有水亭名雪艇湖中產蜺甚肥

學繡女兒行水潯遙看三塔小如鍼並頭菡萏雙飛翼

記取挑絲色淺深

城西學繡里俗傳西子入吳刺繡於此三塔龍淵寺前塔也

梅花小閣兩重階屈戍屏風六扇排不及張銅爐在地

三冬長煖牡丹鞵

里有張鳴岐製銅為薰爐聞於時

鶴湖東去水茫茫一面風溼接魏塘看取松江布帆至

鱸魚切玉勸郎嘗

鶴湖在魏塘清風溼即白牛溼

蓮花細步散香塵金粟山門禮佛頻一種少年齊目斷

不知誰是比肩人

金粟寺在海鹽西南林坤誠齋雜記海鹽陸東美妻有容止夫婦相重寸

步不離時號比肩人孫權封其里

織成錦衾碧間紅繚以吳綿四五通錦上鴛鴦三十六

雙棲夜夜水紋中

里出善錦

和韻

譚吉璉

巷西古塔畫闌紅閣老廳門一徑通
猶記北樓驂蓀地
薔薇一丈曉庭中

天寧佛閣早春開鳥語風鈴次第催
怪道回船濕羅襪

嚴將軍墓踏青來

天寧寺在秀水縣治東北後有嚴助墓

和韻

秀水

陳忱

月壺

東林禪宇白蓮開魚版纔停午復催
坐久雙窳明夕
照布帆一半鵲湖來

長水風荷葉葉香斜塘慣宿野鴛鴦郎舟愛向斜塘去

妾意終憐長水長

長水秦時所鑿斜塘地名

跪地垂楊絮未飄蘭舟上已袞除遙射襄城北南風起

直到吳江第四橋

城北王江湓有射襄橋俗謠為寺香橋即射襄城故址

宣公橋南畫鼓搗酒船風慢拄鴉叉碧山銀盃勸郎醉

權入南湖秋月斜

陸宣公橋在城東朱碧山元時嘉禾銀工宋開人滋南湖草堂記橋李澤

國也東南皆陂湖而南湖尤大

木犀花落擣成泥霜後新橙配作齋猶恐夜深妨酒渴

教添玉乳御兒梨

御兒玉乳梨
見漢書注

畫眉墨是沈珪丸水滴蟾蜍硯未乾休恨圖經山色少

與郎終日遠峰看

沈珪禾人善製墨諺云沈珪對膠十年如石載何遠春渚紀聞郡城四望

無山宋鄭毅夫月波樓詩
野色更無山隔斷是也

和韻

譚吉璉

碧瓦珠光火一丸綠楊絲挂綵幡乾泥孩縱說麗延
好不及曹王廟上看

三姑廟南豆葉黃馬王塘北稻花香秋衣薄處宜思妾

春酒熟時須餉郎

三姑事見括異志今長水有廟馬王塘在其北

小婦春風樓下眠與論家計最堪憐勸移百福坊南住

多買千金圩上田

石門有春風樓錢塘應才為嘉興學正婢曰陸小蓮百福坊人貝瓊元末

避地于金圩

小舫中流播燕梢一螺青水練塘坳隨郎盡日鹽官去

莫漫將儂半邏拋

燕梢小船名長水東有練浦一螺青浦水名劉長卿詩半邏鶯滿樹今謠

為半路

鎗金硯匣行波濺日坐春風小閣前鏤管簪花書小字

把郎詩學魯書編

鎗去聲斜塘楊匪梨工鎗金鎗銀法以黑漆為地鍼刻山水樹石花竹翎

毛亭臺屋宇人物調雌黃韶粉以金銀箔傅之見陶宗儀輟耕錄杜詩編年自禾人魯書始

雨近黃梅動決旬舟回顧渚鬪茶新問郎紫筍誰家焙

莫是前溪讀曲人

秋燈無燄剪刀停冷露濃濃桂樹青怕解羅衣種鴛粟

月明如水浸中庭

禾中產鴛粟相傳八月十五夜俾女郎解衣播種則花倍錄

繡綫圖存陸冕遙唐家花鳥棘鍼描只愁玉面無人畫

須是傳神盛子昭

陸冕禾人有繡綫圖載宣和畫譜唐希雅及孫宿皆善畫花鳥墨作棘鍼

子昭魏塘人嘗
畫崔鶯鶯像

去郭西南桂樹林五畝之園一半陰笑插枝頭最深蕊

兩鬟如粟辟寒金

城西屠氏園有桂二本垂蔭逾畝每歲兩樹迭開金蕊一枝

榆錢陣陣麥纖纖野菜花黃蝶易黏記送郎船溪水曲

平蕪一點甌山尖

甌山在桐鄉今為錢大理貢墓

比翼鴛鴦舉擢迴雙飛蝴蝶遇風開生憎湖上鷓鴣鳥

百遍魚梁曬翅來

鷓鴣湖在海鹽縣西南

龍香小柄琵琶彎切玉瓊瓏約指環試按花深深一曲

海棠開後望郎還

南宋太學服膺齋上舍鄭文秀州人妻孫氏寄秦樓月詞一時傳播酒樓

伎館皆歌之載古杭雜記花深深海棠開後詞中語也昆字唐人多作仄音讀

酒市茶寮總看場金風亭子入春涼俊遊改作烏篷小

蔡十郎橋低不妨

晏殊類要嘉興縣有金風亭蔡十郎橋載至元嘉禾志

落花三月葬西施寂寞城隅范蠡祠水底盡傳螺五色

湖邊空挂網千絲

城西南金銘寺有范蠡祠舊并塑西子像湖中產螺皆五色

蘇小墓前秋草平蘇小墓上秋瓜生同心綰結不知處

日墓野塘空水聲

唐徐凝嘉興逢寒食詩惟有縣前蘇小墓王禹偁詩縣前蘇小有荒墳今

縣南有
賢侶巷

和韻

譚吉璉

參旗橫照郡樓平
塔火初沈漁火生
郭外城中十三
寺一時落月盡鐘聲

風檣水檻盡飛花
一曲春波激濫斜
北斗闌干郎記取

七星橋下是兒家

春波七星
二橋名

天心湖口好花枝
便過三春采未遲
蝴蝶雙飛如可遂

教郎乞夢冷仙祠

天星湖在嘉興縣治東湖北有
協律郎冷謙祠禱夢者有奇驗

江樓人日酒初濃
一一紅妝水面逢
不待上元燈火夜

徐王廟下鼓鼙鼙

徐王廟在府城東北每歲人日穀日挈舟擊鼓士女往觀

河頭時有浣衣人
處處春流漾白蘋
橋下輕舟來往疾

南經娛老北蹲賓

娛老橋在城南蹲賓橋在府治西

芳草城隅綠映衫
鳳池坊北好抽帆
徐恬舊宅芹泥煖

過雨斜陽燕子銜

鳳池坊婁機故宅今郡學之前徐恬宅見陸廣微吳地記

秋涇極望水平隄
歷歷杉青古閘西
夜半嘔啞柔櫓撥

亭前燈火落帆齊

秋涇橋在城北杉青閘名落帆亭名

和韻

譚吉璉

青鶻白鷺浴湖隄飛向羅潭廟口西竹傘梭鞵塵不
到秋風且看稻花齊

屋上鳩鳴穀雨開橫塘游女蕩舟回桃花落後蠶齊浴

竹筍抽時燕便來

橫塘在城東俗名筍之早者曰燕來

漏澤寺西估客多樓前官道後官河正值喧闐日中市

楊花小伎抱箏過

吳船女郎入市
唱曲號唱楊花

五月新絲滿市屢縑車鳴徹斗門邊沿流直下羔羊堰

雙櫓迎來販客船

羔羊堰在石門縣
斗門在石門北

魚梁沙淺鷺爭淘處處村田響桔槔一夜城西茗水下
酒船直並小樓高

和韻

譚吉璉

槐葉青時和冷淘槐葉濃時轉桔槔槐葉黃時香稻
熟登場禾稼比牆高

九里橋西落照銜櫻桃初熟烏爭鷓須知美酒烏程到

遙見新塍一片帆

宋曾魯公監秀州新
塍酒稅今作新城誤

馬場漁澗幾沙汀宿雨初消樹更青最好南園叢桂發

畫橈長泊煮茶亭

彪湖一名馬場湖宋潘師旦以南塢漁澗水十一處會於春波門外建會

景亭南園余叔宜春令別業有桂樹四本高俱五丈蘇子瞻煮茶亭在水北

青粉牆低望裏遙紅泥亭子柳千條郎船但逐東流水
西麗橋來北麗橋

伍胥山頭花滿林石佛寺下水深深妾似胥山長在眼

郎如石佛本無心

胥山在城東十八里石佛寺唐刹

花船新造水中央曉發當湖汊漢塘聽盡鐘聲十八里

平林小市入新坊

舟里東為漢魏二塘德藏寺鐘初成
工戒以勿擊俟行百里擊之工行至

新坊十八里遽擊之由
是不能遠聞載括異志

蒲山草與薺山齊
漵浦潮來乍浦西
白沃廟南看白馬

巫言風雨夜長嘶

蒲山菜薺山俱在平
湖白沃廟祀漢史君

綠煙初洗兔華秋
片片魚雲靜不流
山月池邊看未足

移船買酒弄珠樓

山月池在平湖德藏
寺城東有弄珠樓

鸚鵡湖流碧幾灣
白龍湫水落陳山
游人秦小孃祠過

社鼓聲邊醉酒還

鸚鵡湖即柘湖陳山有白龍湫見括
異志秦小娘晉時人祠在平湖東南

二十里

阿儂家住秦溪頭日長愛櫂橫湖舟霑雲寺東花已放

義婦堰南春可遊

橫湖霑雲寺俱在半灘東義婦堰漢許昇妻呂榮冢死黃巾之難糜府君

歛錢葬之今
謗為呂蒙冢

巫子峰晴返景開傳聞秦女葬山隈閒聽野老沙中語

曾有毛民海上來

樂資九州志鹽官縣有秦駐山始皇
選此美人死葬於山下山之東海口

有巫子山水經注光熙元年有
毛民三人集於縣葢汎於風也

橫浦東連白塔雲下方鐘鼓落潮聞結成海氣樓相似

煮就吳鹽雪不分

白塔山在海中
鹽官亦有鹽市

勸郎莫飲黃支犀
勸郎莫聽花冠雞
聞琴橋東海月上

烏夜村邊烏未啼

聞琴橋在海鹽城東
烏夜村何準宅舊址

和韻

譚吉璉

三條玉帶兩條犀
爭訪金雞夢白雞
高冢累累羊虎

盡塘南塘北亂烏啼

鷹窠絕頂海風晴
烏兔秋殘夜並生
鐵鎖石塘三百里

驚濤鬣盡寄奴城

鷹窠頂在澈浦山椒
每十月朔日月並出海中
晉安帝隆安五年孫恩犯

海鹽劉裕拒之築
城於海鹽故治

招寶塘傾水淺深會骸山古冢銷沈都緣世上錢神貴

地下劉伶改姓金

招寶塘在海鹽西南九州要記古有金牛入山臯伯迪兄弟鑿山取牛山

崩二人同死穴中因曰會骸山郡有劉伶墓土人避錢鏐諱改呼金伶墓

曲律崑山最後時海鹽高調教坊知至今十棒元宵鼓

絕倒梨園弟子師

春絹秋羅軟勝絲折枝花小樣爭傳舟移濮九娘橋宿

夜半鳴梭攪客眠

濮院元濮樂聞所居濮九娘橋在焉

郎牽百丈上官塘客倚篷牕晚飯香黃口近前休賣眼
船頭已入語兒鄉

輕船三板過南亭蠶女提籠兩岸經曲罷殘陽人不見

陰陰桑柘石門青

崇德古南亭石門春
秋時吳壘石以拒越

和韻

譚吉璉

宅西猶石舊名亭曾侍先人說五經夢想故園猶在
眼梭欄一樹假山青

走馬岡長夕照中塘連沙渚路西東不知吳會誰分地

生遍茱萸一色紅

走馬岡在石門永新鄉地有官窯相傳吳越分疆處語兒中涇一名沙渚

塘吳會分地紀書名見太平御覽吳茱萸禾御土產

移家只合覓川居釀就新漿雪不如留客最憐鄉味好

屠墳秋鳥馬嘯魚

閩人卓成大元末僑居覓川馬嘯城殆即水經注所云馬罕城也魚可為腊

郎家湖北妾湖南兩漿緣流路舊詣却似釣鼇磯畔鷺

往來涼月影毵毵

釣鼇磯在南湖中龔太守勉所築

野王臺廢只空墩翁子墳荒有墓門舍宅尚傳裴相國

移家曾住趙王孫

白蓮寺隔水有顧野王讀書臺址朱買臣墓在角里街北真如寺相傳裴

休宅趙王孫謂孟
堅也居廣陳里

秋晚東林落木疎
白蓮僧寺水中居
昏鐘不隔漁莊火

古殿猶存日本書

白蓮寺即東林施水院漁莊在其
北寺壁有日本國人題名二處

蘄王戰艦已無蹤
婁相高墳啟舊封
曾見朋游南渡日

北山堂外九株松

縣東三十里一冢甚高傳是婁機墓
中有石室為盜所發北山草堂沈氏

宅其石壘

自南宋

仲圭舊里足淹徊
曲徑橫橋一水隈
小榭春風誰酌酒

佛香長和墓門梅

吳鎮墓在嘉善
縣治北梅花庵

懷蘇亭子草成蹊六鶴空堂舊蹟迷惟有清香樓上月

夜深長照子城西

懷蘇亭在府治六鶴堂宋知州鄧根建府解有清香樓見異聞總錄子城

載聞總括異志今日為子牆脚

梨花楓葉宋坡湖路轉潮鳴山翠無百里鹽田相望白

至今人說小長蘆

宋坡湖即賁湖吳郡記海濱廣斥鹽田相望樵李舊號小長蘆見周必大

吳郡諸山錄

桑邊禾黍水重圍時有秋蟲上客衣三過堂東開夕照

滿村黃葉一僧歸

三過堂蘇子瞻遺蹟黃葉庵釋智旌所築

百花莊口水云云是吾家太傅墳當暑黃鸝鳴灌木

經冬紅葉映斜曛

百花莊在城北十五里
先文恪公賜塋在焉

鴨嘴小船淺水通荻花門巷蕭蕭風荆南豫北鬪新釀

不比吾鄉清若空

清若空亦秀州酒
名見武林遺事

秋水尋常沒釣磯秋林隨意敞柴扉八月田中黃雀啅

九月盤中黃雀肥

黃雀味甚腴
產陶莊馬疇

和韻

譚吉璉

菜花溼上半漁磯蒼筍林中盡竹扉寒水看同春水

闕高田比似下田肥

江市魚同海市鮮南湖菱勝北湖偏四更枕上歌聲起

泊遍冬瓜堰外船

唐張祜曾願嘉興冬瓜堰稅

妾家城南望虎墩郎家城北白牛村白牛不見郎騎至

望虎何由過郭門

陳舜俞居秀州嘗跨白牛往來自號白牛居士

百步橋南解纜初香醪五木隔年儲不須合路尋魚鮓

但向分湖問蟹胥

去郡城東北三里有百步橋馬永卿懶真子蘇秀道中有地名五木出佳

酒陸游日記合路賣鮓者

甚衆一統志分湖產蟹

石尤風急駐蘇灣
逢著鄰船販橘還
祇道夜過平望驛

不知朝發洞庭山

蘇灣近吳江境上
陳舜俞墓在焉

父老禾興舊館前
香杭熟後話豐年
樓頭沽酒樓外泊

半是江淮販米船

望雲門北舊有禾興館唐李瀚嘉興
屯田政績記嘉禾一穰江淮為之康

嘉禾一歉江
淮為之儉

茅屋東溪興可乘
竹籬隨意挂魚罾
三冬雪壓千年樹

四月花繁百尺藤

東谿從叔
子容別業

舍南舍北遶春流
花外初鶯轉未休
畢竟林塘輪角里

愛攜賓客醉仙樓

山樓從叔子葆所居四方賓客至者必集於此

谿上梅花舍後開市南新酒醖新醅尋山近有父基宅

看雪遙登顧況臺

余近移家長水之梅谿及山在西橫山在其南皆可望見馬顧況讀書臺

在橫山頂

和韻

譚吉聰

木樨開後菊花開黃雀霜螯載酒醅九日登高東塔
寺風沙終勝赫連臺

歸人萬里望丘為白酒黃壺瓠作卮來往權歌無不可

西溪東泖任吾之

丘為邵人王維送之詩云五湖三畝宅萬里一歸人里中黃元吉治錫為

壺極精緻近日鄉人多用匏樽西溪在府城西三里鮑恂所居東泖在平湖

檻邊花外盡重湖到處悲傷興不孤安得家家尋畫手

谿堂遍寫讀書圖

黃子久有由孝讀書圖

和韻

譚吉璉

櫂歌欸乃勝西湖風景尊前調不孤只少松陵朱處士屏風八尺寫新圖

旃蒙單闕

題畫竹二首

疎筠个个倚風輕
忽憶鄉園宿雨晴
三畝宅西桐樹北
此時新筍又應生

雪禽未染唐希雅
怪石須添趙大年
興發欲尋澗柘寺

春流泱泱響山泉

燕京無竹惟澗柘寺東院一林

懷上方山二首

不到上方三歲久
茅茨長想結山隈
盡移細石教泉下
亂插繁花把徑開
僊客春深歸未得
故人書寄約重來

水筒雲碓安排易只欠江南遠屋梅

百丈霞梯湖戶局層崖依舊入天青花源未有秦人住
屐齒曾同謝客經殷地昏鐘催夜月過橋春水續寒汀
精藍近結支纖侶準擬松根煮茯苓

送顧乃西還楓涇

客游五載莫淒然元夕天涯我十年為羨王孫歸去路
岸花江草送吳船

嚴侍郎招同吳明府

山濤

龔觀察

佳育

陳處士

晉明

高上舍

層雲

集吳氏園亭時公子

曾樂

到

任

八驕曉出郭門東避暑閒園河朔同山簡賓寮攜沼上
謝家屐履滿亭中微涼高柳虛簷日過雨新苗隔岸風
四坐傳杯那不醉主人先已百分空

贈吳明府

山濤

詩人吾愛塞翁好風格西陵別擅場嗜酒宵淹千里駕
罷官為起七歌堂雲山畫出無前輩暑雨燈殘話故鄉

角里菜畦猶未賣歸時休只戀餘杭

潞河遙送湯駒南還四首

惜別無從倒玉壺
袂裝遙發短亭孤
荆高舊侶分攜盡
燕市何人送酒徒

青齊南下即扁舟
一片雲帆故國樓
此去向平婚娶了
明年五岳試同遊

生計歸時且掩門
還憐舊業已無存
全家欲傍西溪住
最愛梅花第幾村

竹垞三徑也蕭然歸夢天涯又隔年儻肯結鄰長水市
開門同對小池蓮

懷鄉口號八首

驅舫西偏盡竹梧紫微山石儘教鋪兒孫鄉里堪娛日

不用千金買佛奴

驅舫余齋名元濮樂閒以中
統鈔一千錠買歌兒汪佛奴

先人舊宅北門棲舍後斜陽塔影低門逕傷心難再問
夢魂猶繞舊沙堤

碧漪坊裏譚公宅鴨脚清陰半畝餘最憶兒時好兄弟

樹根同讀五車書

五經進士譚公宅在府治東北碧漪坊舟石郡丞左羽孝廉孝山太守次

友典籍及亡兄舍人夏士皆讀書於
是余亦與焉庭有鴨脚樹三本

舊日園林半已荒
惟餘曲水繞芳塘
少年最憶春游好

曾向顏家看海棠

顏家園海棠花最盛今已摧折

墨林遺宅道南存
詞客留題尚在門
天籟圖書今已盡

紫茄白苧種諸孫

項處士元汴有天籟閣蓄古書畫甲天下其閣下有皇甫子循屠緯真諸

尚存
公題詩

舊游余繆日過從
三李銜杯興最濃
明月綠牕期沈約

白鹽赤米問周顥

憶右吉天自斯年武曾分虎山子青士也

司農泉石向來耽徐穉同遊飲必酣夢想谿山真意好

夏天修竹水亭南

曹侍郎秋岳倦園有谿山真意軒徐穉指敬可也

方外能詩數復公結茅初地虎谿同詞人寂寞宜過此

一舸月明湖水東

復公字文可住初地庵詩格最老

曝書亭集卷九